



Komunikadu Imprensa

Tribunál Distritál Oe-Cusse

31 Marsu 2015

**Tribunál Distritál Oe-Cusse kondena pena efetivu tinan 3 fulan 6
prizaun ba kazu ofensa integridade fizika simples no krime sekuerstru**

Iha 27 Marsu 2015, Tribunál Distritál Oe-cusse kondena arguidu DMO ne'ebé provadu komete ofensa ba integridade fizika simples hasoru lezadu sira hanesan; PT, PTD no ABC. Alende ne'e komete krime ofensa ba integridade fizika simples hasoru lezadu sira, tribunál mós prova katak arguidu komete krime sekuestru hasoru lezadu PT.

Bazeia ba faktu provadu sira ne'e, ba krime ofensa ba integridade fizika simples hasoru PT, tribunál kondena arguidu ho pena prizaun tinan 2. Ba ofensa simples ne'ebé arguidu komete hasoru lezadu PTS tribunál kondena ho pena prizaun tinan 1 no ba ofensa integridade fizika hasoru ABC, tribunál kondena ho pena prizaun fulan 6.

Enkuantu ba krime sekuestru hasoru lezadu PT, tribunál kondena arguidu ho pena prizaun tinan 1. Depoisde apresia kazu ida-idak hosi sentensa ne'e, tribunál konklui no kondena arguidu ho pena efetivu tinan 3 fulan 6 prizaun.

“Dezisaun ne'e refleta krime nia gravidade tanba kondenadu komete ofensa hasosu ema diferente nain haat ho krime diferente rua. JSMP hein katak sentensa ne'e bele sai referencia ba comunidade atu maneja sira nia probema no buka atu aprosima malu iha maneira laho violénsia,” dehan Diretór Ezekutivu JSMP, Luis de Oliveira Sampaio.

Tribunál prova katak katak iha 03 Juñu 2014, maizumenus iha tuku 16:30 lorokraik, arguidu ho kondisaun lanu arguidu tuku dala rua iha lezadu PTS niaibun, no dala ida iha lezadu nia matan fukun. Aktus ne'e rezulta lezadu sofre kanek iha parteibun no bubu iha matan fukun.

Depois akontese, lezadu fila ba uma no fo hatene nia aman (PT). Wainhira rona tiha informasaun ne'e, maisumenus iha kalan lezadu sira ne'ebé kompostu hosi PT no ABC (nu'udar mane foun) no DP (membru família ida tan) ba kedas iha arguidu nia uma. Sira nia intensaun ba arguidu nia uma atu husu tuir kona-ba arguidu ninia hahalok ne'e. Maibé wainhira sira to'o iha arguidu nia uma, arguidu husu fali ba lezadu sira katak sira ba nia uma atu koko arguidu.

Depois husu, arguidu basa kedas lezadu ABC iha nia kanuruk dala ida no tuku PT nia ren-toos dala 1 no rezulta PT monu kedas iha arguidu nia uma laran. Depois ida ne'e, arguidu xave metin lezadu (PT) iha nia uma laran maisumenus durante oras 4 no sira seluk halai tiha.

Hafoin, liu tiha oras 4, PNTL ba iha arguidu nia uma no lori lezadu ba hala'o tratamentu iha ospital. Kazu ne'e akontese tanba dezentendimentu entre arguidu no lezadu PTS iha momentu sira partcipa iha seremónia hakoi mate.

Faktu akontesimentu hirak ne'e dokumenta hotu liuhosi relatóriu médiku no fotografia hosi Óspital Referral Oe-cusse.

Julgamentu ba leitura sentensa ne'e prezide hosi tribunál singular, Dr. João Ribeiro, ministériu públiku representa hosi Dr. Ambrosio Rangel Freitas no arguidu hetan defeza hosi Dr. Afonso Fatima Gomes.

“Kommunikadu imprensa ida ne'e bele imprimi tan ho apoiu jenerozu husi povu Amerikanu liu husi Ajensia Estados Unidos ba Dezenvolvimentu Internasionál (USAID) bazeia ba Akordu Kooperasaun ho Número AID-486-A-13-00007 ba programa Ba Distrito iha Timor-Leste, ne'ebe nia implementasaun lidera husi Ajensia Counterpart International ho nia parseiru sira. JSMP mak responsabiliza tomak ba konteudu no hanoin iha komunikadu impresna ida ne'e nia laran no la nesesariamente refleta USAID ka Governu Estados Unidos Amerikanu nia opiniaun”.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org